



Nukissiorfiit innaallagissamik imermillu tunisassiornermini pilersuinerannillu aalisakkanuk tunisassiorfinnut illoqarfinni nunaqarfinnilu ataasiakkaani 41,5%-imik akeqartitsinerup assinganik nunap qaavani toqoraavinnut s.a. Neqi A/S aamma Lilleholm Aps-imut atuutinneqalernissaannik Naalakkersuisut piginnaatinneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Suka K. Frederiksen, Siumut)
(Siullermeernera)

Siunnersuuteqartup kissaatigaa uumasunik toqoraaviit nunamiittut innaallagissamut imermullu akiligassaat ilanngaaserneqartalissasut soorlu aalisakkerivinni taamaattoq. Akiliummut ilanngaat tunniunneqartalissaaq allat suliffiit innuttaasullu naliginnaasut akigalugit, imermut innaallagissamullu annertunerusumik akiliisalersillugit.

Demokraatini isumaqatigigaluarparput assigiimmik atungaqartoqassasoq taamaattumik soorunami uumasunik toqoraaviit nunamiittut aalisakkerivittulli periarfissaqartariaqaraluartut. Kisianni uumasunik toqoraaviit kisimik eqqarsaatigineqarsinnaanngillat. Immiorfiimmi soorlu Nuuk Imeq aamma Godthaab Bryghus, imermik atuisupilussuit? Annertuumik atuisartunut aaqjissuussineq sullivinnut allanut ammaatissagaluarutsigu sorpassuit ammaassinnaavagut. Kisianni tunngaviusumik aklerlaarput sulliviit inatsisitigut periarfissaqartinneqassasut innaallagissamut imermullu akiliutiminnik ilanngaaserneqartarnissaminnut.

Taamaattumik uumasunik toqoraaviit nunamiittut aalisakkerivittulli ilanngaanneqartalernissaat kisiat eqqartortariaqanngilarput - annerusumik oqallisigisariaqaraluarparput ilumut naapertuunnersoq aalisakkeriviit akiligassaasa ilanngaaserneqartarnerat, sulliviit allat innuttaasullu naliginnaasut akilertagaannik.

Demokraatini isumaqarpugut naapertuutinngitsoq anaanaq kisermaaqq pissakilliortoq qaffasinnerusumik innaallagissamut imermullu akiliisarmat aalisakkeriviup annertuumik sinneqartooruteqartartup akiligassaa ilanngaaserneqartarniassamat. Uangut isumarput naapertorlugu tamanna torinngilaq.

Piumanerungaarparput inatsisitigut akiliummut ilanngaaserneqartarnissamut periarfissiissutaasoq peerneqassasoq kinguneranillu sulliviit ataasiakkaat aamma/imaluunniit assigiimmik inuussutissarsiutillit annertuumik pisisartutut akiligassamik ilanngaaserneqartarnissaat Nukissiorfinnut isumaqatigiinniutigisalisagaat. Tamatuma kinguneranik soorunami akinik annertussusilersuisarneq allanngortittariaqassaaq Nukissiorfiit nammineerlutik annermik akinik aalajangersaasinnaalersillugit.



Siunnersuutinin innuttaasunut nalinginnaasunut akitsorsaataasussanik akuersinialeraangatta tunngaviumik eqqarsarluaqqaartariaqarpugut. Aamma tamanna pissutigalugu iluarisimaarluinnarparput Naalakkersuisut allannguutissatut siunnersuutiminni piumasarimmassuk aalisakkeriviit imermut innaallagissamullu akiliutiminnut ilanngaaserneqartarnerisa itinerusumik misissorneqassasoq nutaamik akinik aalajangersaanissamut Naalakkersuisut UPA2017-mi saqqummiunniangaannut atatillugu.

Siunnersuut ataatsimiititaliamut suliarisassanngortinneqassappat ersarissumik ataatsimiititaliamut kaammattuutigissavarput misissoqqullugu ilumut naapertuunnersoq suliffissuit ilaasa imermut innaallagissamullu akiliutiminnut annertoorsuarmik ilanngaaserneqartarnerat - uangut tamatta akilertakkatsinnik.

Tamanna tunngavigalugu inassutigaaarpugut Naalakkersuisut allannguutissatut siunnersuutaat akuerineqassasoq.